

近代中國史料叢刊第六十輯  
沈雲龍主編

湘綺府君年譜

王代功述

文海出版社  
印行

湘綺府君年譜

癸亥秋七月  
湘綺樓藏版

W-24/18

翻印必究

[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



[www.docsriver.com](http://www.docsriver.com) 商家 本本书店  
内容不排斥 转载、转发、转卖 行为  
但请勿去除文件宣传广告页面

若发现去宣传页面转卖行为，后续广告将以上浮于页面形式添加

[www.docsriver.com](http://www.docsriver.com) 定制及广告服务 小飞鱼  
更多**广告合作及防失联联系方式**在电脑端打开链接  
<http://www.docsriver.com/shop.php?id=3665>



湘綺府君年譜第一卷

長子代功述

府君姓王氏諱闔運字王甫湖南湘潭七都移風鄉常安里人也王氏之先與周同祖唐定郡望爭稱太原湘潭七都爲明三十九都地舊譜云自山西避兵至贛州復遷衡陽西鄉居數世當嘉靖中遷湘潭城外黃龍巷又云遭楊應龍之變乃避贛越二世遷衡陽新譜云楊應龍反播州在萬厯初王氏至湘潭已二世矣避兵雖非應龍而相傳有播州亂疑本貴州人也據舊傳及明時墓石推攷其年遷潭當在明孝憲時始遷祖曰東山

府君五傳至朝僑字惠人居石泥塘田過萬畝歲積穀  
錢無所用直刻大竹盛之委階庭間當是時湘潭繁富  
甲天下吾家亦極盛於此時惠人君有子五人並有才  
執第四子中傳字石泉性澹靜不營世事以詩酒自樂  
居許家橋昆弟煊赫爭以豪侈相尙閉門守靜寂如也  
有子二人長曰之駿字適齋性穎敏弱冠入縣學當乾  
嘉之際民物盛滿穀賤貨貴富家不能節則稍衰敗昆  
弟六家唯適齋君田宅未損諸家欲賣田則責令強受  
之無錢則舉債以應遂大困未二十年已田宅亦斥賣  
略盡乃棄鄉居遷省城買屋三椽於善化文廟旁小巷

家世名醫以術治疾貧者不取錢且施以藥名乃大起  
姻黨歸其盛德欽其宿學識李文恭於孤貧曰此非寒  
生也後輩名者如賀尙書長齡毛西垣國翰黃虎癡本  
驥皆執弟子禮年七十以壽終配戴夫人江蘇句容人  
南澳同知諱志達之女生二子長諱士璠字奐若次諱  
麟字步洲府君奐若君之次子也





道光十二年壬辰 十有一月辛丑府君生

十一月二十九日午時生於善化學宮巷內居宅先

夕祖妣蔡夫人方坐庭中見流星墮地光芒照室驚

異之入室而作次日生府君

此事代功聞之從祖父步洲君之側室羅氏羅

時與祖妣閒話親見此異故言之特詳

廣額修眉方頤後耳有異常兒

時家貧甚五月中遭曾祖考適齋君之喪曾祖妣戴

夫人年已七十祖考奠若君輟學為賈從祖父步洲

君授徒自給歲入僅數十千祖妣蔡夫人竭力經營

克勤克儉故家無廢事且時贍給族姻祖妣初生一

男元殤至是生府君曾祖妣七十乃見孫倍愛憐之

道光十三年癸巳 二歲

十二月葬適齋君於善化南門外一都二里牌林子  
衝是爲吾家墳墓葬長沙之始

道光十四年甲午 三歲

府君幼穎悟祖妣教以古歌謠及唐五言諸詩卽能  
識字曾祖妣喜曰此兒他日必成名惜余不及見耳

道光十五年乙未 四歲

道光十六年丙申 五歲

道光十七年丁酉 六歲

二月十六日祖考奐若君卒府君哭泣如禮有若成

人是歲患病危篤及愈體羸弱足不能過門限曾祖妣保抱扶持日以白朮餌之病始有瘳十月耐葬奠若君於林子衝

道光十八年戊戌 七歲

善化李鼎臣先生設塾里巷曾祖妣以其距家稍近命府君從讀授以論語孟子朝往夕歸道中羣兒或戲侮之府君一不與較識者已知爲大器矣

道光十九年己亥 八歲

仍從李先生讀

道光二十年庚子 九歲

金言卷一  
是歲畢誦五經能屬文時姑家子郭正齋新楷少有  
神童之目亦少孤居省城兩家族黨過從者咸敬異  
焉

道光二十一年辛丑 十歲

始學時文帖括家貧不能延師曾祖妣乃命府君從  
步洲君讀並授作文之法

道光二十二年壬寅 十一歲

道光二十三年癸亥 十二歲

四月十五日曾祖妣戴夫人卒府君幼依祖母自適  
齋君卒後家益困始將學宮巷居宅斥賣營葬遂僦

屋而居是歲步洲君假館宜章縣署府君從之游學  
益厲志於經史詞章昕夕不輟

道光二十四年甲辰 十三歲

道光二十五年乙巳 十四歲

道光二十六年丙午 十五歲

是歲僦居楊家花園時步洲君歷年應州縣書記之  
聘來往無常府君從游不便因命居家侍母時家中  
無書省城求書亦至艱往往展轉假借擇要鈔讀當  
是時天下方驚於科舉宣宗尤重翰林以一童生不  
數年可躋二品故父老以科甲督責子弟甘心不悔

全譜卷一  
府君不喜制舉之業嘗假得楚詞讀之驚喜塾師目  
爲襍學禁止勿觀府君則於作文時竊誦之塾師出  
不意從後掣其卷藏焉蓋當時風尙如此府君益發  
憤欲並古之作者尤欲多讀未見書且自恨孤陋遂  
一意於取友

道光二十七年丁未 十六歲

始就外傳從劉先生煥藻讀書三卡同學七人始識  
長沙羅伯賡熙贊羅丈通博有文名故識武陵劉采  
九鳳苞劉丈居城南書院爲肄業生院長陳堯農先  
生本欽鄧辛眉丈繹妻父也與鄧彌之丈輔綸俱居

院中府君與羅丈論詩羅言及二鄧府君欲訪之未暇也

道光二十八年戊申 十七歲

讀書營盤街戴祠始應童子試鄧丈彌之兄弟聞府君月落夢無痕詩句奇之特來造訪其時李文篁仙壽蓉丁丈果臣取忠龍丈皞臣汝霖皆居城南院齋府君因定交焉李文放誕自喜尤擅才名與府君相得甚懽日夕過從嘗於十二月雪夜李文徒步來宿書室刻燭聯句二十韻名篇劇韻傳誦一時名字漸達湖外府君因城南交友之盛遂移家城南定入院

讀書之計

道光二十九年己酉 十八歲

肄業城南書院院長陳堯農先生工制藝每聚諸生講學非高材生不得入內聽講陳先生因府君雋異特許入內齋每有問難輒驚老宿長沙熊雨臚先生少牧以孝廉名動海內詞賦科舉爲一時之冠因事被議與朱丈宇恬昌琳居址相近朱丈特介紹府君問業熊先生選文四十篇屬府君熟讀未數日復往請益熊先生怪之因問文家派別府君具道其所以應答如流不失一字熊先生歎曰子能自得師但勤



精研無負期望退而告人曰吾生平未見此才不獨  
吾當讓出一頭地卽古來作者恐亦當退避三舍矣  
自道光二十六年湖南瀕湖圍田水災後復連年  
水旱是歲東南各直省復大水飢民入長沙者數萬  
新甯土匪李沅發因連歲饑饉聚黨倡亂殺知縣據  
縣城擾及廣西邊境廣西亦因旱飢民日思亂於時  
承平日久自廣東燒煙事起宣宗尤畏疆臣生事故  
各省大吏均以鎮靜爲主諸生肄業者猶謹守臥碑  
聖諭諸訓不敢論列天下事雖亂象已成而士子欣  
欣鄉學湖南風氣頗與道光初年異矣

道光三十年庚戌 十九歲

三月應縣試知縣李寅菴先生春暄拔置第一提督學政爲車公順執取入縣學發落日以府君文不合式爲訓而獎掖備至聞者異之 是歲因丁丈果臣始識彭砥先丈嘉玉彭君習三禮於國朝言禮諸家學派最精又喜言兵法居長沙城中默然無聞亦不與時輩交遊府君一見與語大說遂有志於習禮每講論輒移晷達旦又手鈔史記成帙日夜讀之蓋自是始欲通經致用非僅誥訓詞章而已

咸豐元年辛亥 二十歲

李丈篁仙既耽吟詠遂約同人倡立詩社龍丈皞臣年最長次李次二鄧次府君每擬題分詠各賦一詩標曰蘭林詞社鄧丈彌之尤工五言每有所作不取唐宋歌行近體先是湖南有六名士之目謂翰林何子貞進士魏默深舉人楊性農生員鄒叔績監生楊子卿童生劉霞仙諸先生風流文采傾動一時李丈乃目蘭林詞社諸人爲湘中五子以敵之自相標榜誇耀於人以爲湖南文學盡在是矣後以語曾文正公國藩時羅忠節公澤南在曾幕中居恆講論以道學爲歸尤惡文人浮薄一日李丈於曾所言五子近

狀羅公於睡中驚起問曰有近思錄耶李聞言勃然  
曾公笑解之 是歲三月府君游邵陽八月與龍鄧  
二丈遊衡山 去歲正月宣宗成皇帝登遐廣西亂  
始上聞六月洪秀全楊秀清等始亂於桂平之金田  
村

咸豐二年壬子 二十一歲

二月往江西南昌時鄧丈父厚甫先生仁堃方守南  
昌府中賓客才彥頗盛長洲孫月坡丈麟趾尤擅詞  
曲長於府君幾四十歲爲忘年交陳希唐丈景雍斗  
酒百篇其甥李伯元丈仁元以進士改知縣選樂平

道過南昌見府君激賞之堅邀至縣署李丈負才氣  
每有所感輒慷慨激昂發爲詩歌以攄煩懣當是時  
廣西寇已陷永安圍桂林四月寇解廣西圍陷全州  
入湖南七月賊黨蕭朝桂自永興率千餘人由攸醴  
襲長沙二十八日至石馬鋪遂圍省城時祖妣蔡夫  
人方居省城府君在樂平聞警星夜馳歸八月至長  
沙城外民居爲寇所據無店舍可宿夜投水陸洲漁  
船宿焉遣書告長沙知府鍾音鴻不報明日行至城  
下視之時城中兵勇八千餘人安化羅文僖公繞典  
以前任雲貴總督來長沙佐巡撫治軍諸舉貢生監

各自請領百人或數十人佐巡堞口城外往來者皆  
繼以出入唯獨南門禁止行人府君至大西門見毛  
先生運如方巡堞口乃得繼以入共議城守事城中  
被圍日久援軍亦大集賊募榔桂礦夫穴城根地雷  
數發鄧公紹良瞿公騰龍屢拒却之寇圍城久不下  
十月十九日渡湘西走方省城之被圍也書院中諸  
生多散歸郭丈正齋彭丈砥先與府君過從最密常  
指畫地圖高談兵略彭丈憤將領之不職與府君書  
有云假我以權庶幾牧頗府君亦以時事日棘究心  
兵法有從軍之志然以節母在堂孤子當室未敢請

也 十一月寇已破岳州圍武昌長沙解嚴李文復遣書問訊祖妣仍命府君往樂平而岳州已下道路阻塞乃由萍醴至袁州十二月過南昌鄧文辛眉留之度歲寓居府齋娛園文酒談燕無虛日除夕與孫丈月坡陳丈希唐鄧丈辛眉刻燭聯句爲長歌始有祭詩之舉作祭詩神絃數章是後六十餘年以爲常

咸豐三年癸丑 二十二歲

正月由南昌至樂平夏五月寇犯南昌江西列郡大恐李文至鄱陽與沈丈槐卿衍慶議兵事沈丈因事至省城李文權知鄱陽縣事府君從之鄱陽祖妣聞

南昌兵警專使至樂平促府君速歸七月初乃由鄱陽買舟還湘行至袁州夢李丈來告別蓋府君自鄱陽行未十日而鄱陽陷七月十四日李丈與沈君同戰死府君方在道未之知也八月還長沙十月移家湘潭縣城內學坪十一月先妣蔡夫人來歸外曾王父諱璜字礪溪以俠義見重於時外王父諱榮森初名曉原字惺吾爲諸生最有文名與丁丈果臣居城南院齋相友善丁丈知先妣賢淑復稔府君嚴於擇配特媒合焉時府君貧寒而外家豐厚先妣知詩書習大義方在幼時外王母李太恭人以鍼黹所積



得數百金託葛氏姨母代權子母預爲歛資葛母病革時指箱中千五百金屬其子息代交蔡氏且曰此某姑孀銀吾受若母屬託不可負也及後忽背言時外王母已前卒或勸先妣證之謝曰資裝有辦且彭先妣之過慮吾不忍也卒不許于歸之後戚友聞其事者咸歎異以爲難能府君亦敬禮焉 是歲於南昌書肆得宋牧仲對簿時手錄蘇詩始歎先輩精專雖遭顛沛猶不輟業乃定每日鈔書之課適得宋版玉臺新詠因影寫之李丈伯元以爲必無成理未三月書成李丈驚服自是日必鈔書道途寒暑不少輟

五十年中書字以萬萬計蓋自二千年以來學人鈔錄之勤未有盛於府君者也

咸豐四年甲寅 二十三歲

正月謁李雲根先生先生高門華胄不樂仕進隱居壩子塘書畫琴奕並入妙品獨坐藜床罕接人事與之言談言微中常慕唐六如董天士之爲人先妣爲先生甥女故府君往見焉談話移日謂府君曰子努力自愛四十以後當軼羣絕塵非他人所能及也府君心折其言以爲有道之士也終身敬服焉 方二  
年十月寇之解圍東下也十一月破岳州十二月陷

武昌三年二月遂陷江甯據爲僞都會文正公以丁憂侍郎奉寄諭幫辦本省團練人民得上書言事府君屢論事曾公輒嘉納之三月寇圍岳州官軍潰退復還省城寇距靖港復由甯鄉犯湘潭二十五日湘潭陷府君與陳文雋丞建議以全軍救湘潭敗則退保衡州彭丈砥先欲先攻靖港曾公主持重遂用陳策先救湘潭四月二日靖港人民來乞師言已立浮橋濟師大軍一去賊必敗走曾公志在東下遽變計自率二千人攻靖港寇屯甫戰卽潰退靖港距省城六十里敗聞皆戰栗失色三日忠武公塔齊布大破

寇於湘潭靖港寇聞之退走曾公乃修船選士合謀  
渡湖于時彭剛直公玉麐方率水師爲營官陳文雋  
丞士杰方居陸軍參謀畫皆與府君友善論兵事多  
相合乃約府君從軍馮樹堂先生卓懷獨於曾公前  
力言行軍死地王某孤子新婚未有子嗣儻有不測  
無以慰節母之心曾公疑府君不樂從行故挽馮言  
之心頗不懌而無以難之府君亦不欲自明乃止  
五月復移家居省城時洪寇之亂蔓延七省府君憂  
之以爲蘇浙湖廣江西皆古江南地也因用庾子山  
舊賦名作哀江南賦賦成傳誦一時 八月長女無

非生 九月仍往南昌 十月客游武昌覽江漢之  
勝感慨興衰登臨賦詩 曾軍之攻九江也夏丈憇  
庭廷蔭方署湖北布政使與府君議攻堅之不便請  
府君作書上曾侍郎陳五利五害謂宜回屯武漢厚  
集其陳始可東下無根本之虞曾公以羅君大捷半  
壁山水師亦連勝斷江岸鐵鎖宜乘銳氣直擣金陵  
遂不用其計請劉公霞仙作書報府君其後水師被  
襲曾公始服其先見 十二月二十日由武昌還長  
沙至岳州遇風不能渡湖岳州知府魁聯公會爲步  
洲君居停因留度歲除夕遂登岳陽樓

咸豐五年乙卯 二十四歲

正月五日還長沙鄧丈彌之以事還武岡府君與城南舊友餞之於寓齋元夕張燈談笑盡懽作湘東春別詩鄧丈堅約府君往武岡家中教其弟子讀時戎馬倉皇府君念客游非計諾之二月往武岡當是時水師已敗於九江武昌三陷胡文忠公彭剛直公守禦上游故長沙幸得無恙祖妣率家人猶守居省城諸長老僉以爲長沙非善地從祖父惺原君與外王父惺吾君合謀以先妣廩資二百四十金典明岡張氏宅

此與七夕詩自注微有不同代功聞之先妣言事實如此張氏宅土人呼之曰桐樹屋場代功

即生於是宅也徐先生澗曾先生侗故居南鄉居址接近患

難可以相助二先生者孝弟孚於一時故往依之四月祖妣率先妣及家人遷居明岡八月府君自武岡始來新居 九月復往武岡 十二月還明岡 是

歲始治三禮以禮經難讀先自禮經始作儀禮演十

三篇分章節正句讀實爲注經之始是書家有存稿唯缺喪服諸篇

以先祖妣在堂故未讀喪禮也厥後數易稿成禮經箋故廢棄之又於其時選高岑

王孟李杜韋儲錢常各體爲唐十家詩鈔并加圈點

評語焉

咸豐六年丙辰 二十五歲

正月與書曾侍郎言兵事勸其建議撤團防廢  
清理田賦以蘇民困而清盜源言雖未用胡文  
鄂正用其策湖北富強至養兵五萬用以平寇  
二月往武岡鄧氏 五月長子代功生 十一  
明岡山居 江西事益亟塔忠武公已前卒周  
代統其軍大敗於樟樹鎮湘軍奪氣時鄧丈父  
江西省局曾文正公乃令李次青丈元度鄧丈  
及前平江令林君源恩別募新軍皆用平江人  
丈所將爲楚軍鄧丈所將爲江軍鄧丈曾以詠  
詩忤夏翰林陰嗾學政廉公兆綸劾之廉居河



專饒信間軍事知布政使者齡公與鄧父不協遂奏  
言臬司子不宜將詔曾文正公查辦因陳明鄧丈將  
兵原委遂罷所將軍並請將鄧父嚴議其後林君於  
撫州戰沒府君爲歎息焉 是歲始治今古文尙書  
咸豐七年丁巳 二十六歲

正月往武岡鄧氏 七月還明岡 時江西軍務緊  
急曾文正公督辦軍務江南大營亦於去年失陷金  
陵賊酋內亂唯湖南稍得休息朝議補行壬子乙卯  
兩科鄉試放考官舉行科場事或以告府君宜及期  
應試者府君見沿途寇盜充斥度考官必不能至輒